



PNDS

Hamutuk ita
dezenvelope nasaun

Novembru 2014

Sosializasaun faze I ba siklu 2 iha Distrito Manufahi

Sosializasaun PNDS Faze I ba Siklu 2 Ramata Ona

Suku 149 ne'ebé implementa PNDS iha Faze I, agora ramata ona sosializasaun PNDS ba siklu 2 (15/11/2014). Siklu PNDS iha etapa 1 to'o 12, iha sosializasaun ida ne'e konsentra liu iha nivel sub-distritu, ho objetivu atu atualiza informasaun jerál kona-ba PNDS ba autoridade lokál, delegasaun territorial, lider komunitária no sosiedade sivil sira atu nune'e sira bele iha informasaun báziku kona ba prosedimentu nomós lala'ok husi programa nasional dezenvolvimentu suku ne'ebé governu estabelese ona iha territóriu.

Rogério da Conceição, representante setór saudi husi sub-distritu Aileu Vila menciona katak : "Sentru Komunitaria balun iha suku ami utiliza ona sai hanesan fatin SSKA (Servisu Integradu Saudi Komunitaria)". Iha intervensaun ne'e nia sujere katak fatin públiku hirak ne'ebé mak sai hanesan sentru atendementu ba públiku presiza tebes hetan apoiu husi programa atu harii hela fatin atu nune'e bele fasilita profissionais sira hodi servisu hakbesik liu ba comunidade.


Suku hotu iha territóriu estabelese ona PNDS. Implementasaun PNDS rasik hala'o fazeada, Faze I atu kompleita ona siklu ba tinan ida (etapa 1 to'o 12) no agora tama ba iha siklu 2 hodi hahú prosesu etapa foun, Faze II maioria tama ona iha etapa 9 ba 10 no Faze III tama ona etapa 4 tuir siklu PNDS ne'ebé iha.

Hametin no Fortifika Kordenasaun Lina Seitoral Iha PNDS

Kordenasaun entre seitoral iha programa nasional dezenvolvimentu suku, iha Timor Plaza-Dili, 21/11/2014. Sorumutu kordenasaun ida ne'e importante tebes tanba bele halo avaliasaun ba servisu hamutuk entre seitoral iha PNDS ne'ebé akontese tantu iha nivel nasional nomós sub-nasional.


Miguel Pereira de Carvalho, hanesan Co-Chefia-Diretór Geral Dezenvolvimentu Lokál, iha ninia lia mak loke hatete katak : "Enkontru ida ne'e importante tebes tanba ita bele hametin liu tan liña kordenasaun entre seitor hotu hahú husi nivel nasional to'o iha sub- nasional".

Jasinto Gusmao, hanesan Diretor Geral SEFOPPE hatete katak : "kordenasaun seitoral too iha nivel baze importante tebes tanba bele evita duplikasaun programa". Nia sujere katak difikuldade dezenvolvimentu ne'ebé comunidade enfrenta presiza intrega hotu ba PNDS, tanba liu husi PNDS comunidade rasik mak sei decide, planea no implementa atu nune'e bele responde lalais difikuldade ne'ebé sira enfrenta.




Prioridade sira iha nivel nasional

Faze 1



Faze 2



- Saude
- Bee Mos no Saneamentu
- Edukasaun, Cultura e Desportu
- Agricultura, Siguranca Alimentar no Buka Moris
- Dalan, Ponte no Kontrolo de Cheias
- Solidariedade Sosial
- Sektor Seluk



Maluk Feto Sira Hatudu Duni Partisipasaun Iha PNDS

Programa Nasionál Dezenvolvimentu suku hanesan programa ne'ebé enkoraja ema hotu atu participa iha dezenvolvimentu, tantu feto, ferik, katuas, juventude, inklui ema ho deficiente. Iha suku Manapa Postu Administrativu Cailaco, no suku Tapo Tas Postu Administrativu Bobonaro, Munisípiu Bobonaro, feto sira iha vontade maka'as hodi participa iha servisu konstrusaun.

Partisipasaun feto sira iha servisu konstrusaun, hatudu katak feto sira iha vontade no espíritu ne'ebé boot atu participa iha Dezenvolvimentu hodi nune'e bele alkansa dezenvolvimentu. Komunitade husi suku Manapa espresa sira nia sentimentu kontente tanba programa PNDS tama iha sira nia suku bele ajuda sira hetan servisu no hetan insentivu oituan hodi responde nesesidade báziku iha uma laran. "Ami kontente ho PNDS tanba bele fasilita comunidade hetan servisu". Madalena Soro, hanesan Ekipa Jestaun Suku husi Suku Manapa, Cailaco.

Iha servisu ba rehabilitasaun estrada ne'ebé hala'o indika katak barak liu maluk feto sira mak involve an hodi fó sira nia kontribuisaun atu hadi'ak kondisaun estrada iha sira nia suku, tuir Jeferino Soares Lemos, Xefe suku Manapa katak : "Komunitade Suku ida ne'e iha komitmentu atu participa direita iha servisu rehabilitasaun tanba estrada ida ne'e iha tempu udan difikulta tebes transporte públiku atu fasilita comunidade asesu ba merkadu". Maluk feto sira husi suku rua nee hatudu duni sira nia vontade no espíritu partisipasaun ba servisu rehabilitasaun estrada ne'ebé hetan

finansiamentu husi PNDS, ne'e hatudu katak atu fo susesu ba dezenvolvimentu iha rai laran, laos responsabiliza husi ema ida deit, maibé ema hotu iha responsabilidade moral atu lori dezenvolvimentu nasaun ida ne'e ba iha futuro ne'ebé diak.



Komunitade Suku Lahae Hetan Benefisiu Husi PNDS

"Irigasaun ne'ebé halo husi PNDS, laos utiliza deit ba natar, maibé utiliza mós ba hakiak ikan, manu rade nomos kuda modo", hatete husi Luis Gonzaga, hanesan comunidade husi Suku Lahae, Aileu.

Irigasaun ida ne'e comunidade mehi kleur ona atu halo rehabilitasaun maibé suku kbiit la to'o, ho prezensa programa PNDS ajuda tebes comunidade sira hodi tau hanoin hamutuk no deside rehabilitasaun irigasaun mak sai hanesan prioridade importante tanba comunidade suku ida ne'e maioria moris ho vida agrikultura.

Lider komunitária ho comunidade tomak sente orgulhu tebes ho PNDS tanba iha programa ida ne'e fó duni benefisiu ba sira.

"Ha'u kontente ho PNDS tanba diferente ho programa sira seluk, iha PNDS comunidade mak identifika rasik sira nia nesesidade, sira mak implementa no laos kompañia mak implementa", hato'o husi Vasco Rosario Fatima, hanesan Xefe Suku Lahae.



Atu hetan informasaun tan:
www.pnds.gov.tl
info@pnds.gov.tl

Atu fo imi nia hanoin:
keixa@pnds.gov.tl